

Aber ain yeder Herz soll bedacht sein/ thainen ledigen knecht fürter thain Gresten noch annder Weingart arbait in bestanndt oder geding auch thain Weingart oder ander gründt erblich züberlassen/ allain Er sage zue sich nach gelegenheit der zeit / vnd fürnemlich innerhalb zweyen Jaren im Lanndt heüßlich nider zesezen.

Dan das annogten der Vogtknecht vnd Schermleüt/ soll hinfuro allenthalben in vnsern Niderösterreichischen Lannden/ bey meniglich hohen vnd nidern Standts gantz absein.

## Von Schotten vnd Saffoyern.

Dieweil wir auch bericht sein/ der beschwörung vnd geprechen / so sonderlich die Stett vñ Märckht in vnsern Niderösterreichischen Lannden bisheer mit den Schotten/ Saffoyern/ vñ dergleichen auslendigen Kramern getragen haben. Demnach aus bewegliche vrsachen/ Gebieten vñ wollen wir/ das hinfür thainer derselben Schotten/ vnd Saffoyern/ zwischen den Jarmärckhten / in vnsern Lannden sayl haben soll/ Er sey dann in vnsern Lannden in ainer Statt oder Märckht angefessen/ hab auch Burgerrecht/ vñ von solcher Statt oder Märckht ain genuessam vñ hundert vñ glaubbrieff/ darinn Sy bekennen das Er jr mitburger sey/ Alsdan mag Er an den orten/ wie anndere Kramer im Lanndt/ sein Kram aufflahen / vñ sayl haben/ doch nit hawsiern/ welches auch allen Burgern verpotten sein soll Wellicher Schott oder Saffoyern aber nicht angefessen wär/ vñ sollich brieff wie yez gemelt ist nit het/ der soll nicht in vnsern Lannden aufflahen/ noch sayl haben/ dann allain auf den Jarmärckhten vñ Kirchtagen/ vñ sonst in thainen weeg. Vnd vmb deswillen sollen die Burger in Stetten vñ Märckhten/ aller Khauffmans waar vñ gattungen / allzeit nach gelegheit vñ leüß zimliche Pfenwerdt/ in recht sayllem kauff vñ guttem werdt geben. Wellicher Schott oder Saffoyern auch nach eröffnung diser vnser Pollicey ordnung/ in ainem halben Jar betreten vñ befunden wurde/ das Er derselben vnser Ordnung zewider gehandelt/ der soll das Lanndt züräumen/ oder aber Burger zü werde gewisen werden. Aber wellicher nach aufgang des halbē Jars der gemelten Publicierung/ als ain Vbertreter sollicher Ordnung befunden wurde/ dem soll erstlich durch die Obrighaitten der zehent tayl/ Zum andern mal der halbtayl/ vñ zum dritten mal sein waar/ hab/ vñ Kram/ gar miteinander genommen werden/ Doch hierin

aufgeflossen/wo wir mit vnserer Hofhaltung sein / da soll gedachten Schotten/Saphoyern/ vnnnd dergleichen personen Ir Kräm aufzschlägen zuegelassen sein.

## Von Gulden Tuech vnnnd Seyden waaren.

Dann von wegen der Gulden vnd Silberer Tuech/auch Samat/Damaschk/Atlas/vnd anderer Seydener waar/so in Welsch Länden vnd andern ortten gemacht/die an der güet vngleich/Aber dannocht erwan die schlechten/ziehen den guetten durch die Kaufflewt vnd Sophoyer in vnnsern Länden/in Jarmärckhten/vnd da zwischen in Stetten/vnd auf dem Lannd hingeben vnd verkaufft werden/darjñ der gemain man vnwissend mörcklich vbernommen auch dardurch ain groß gelt aus vnnsern Lannden verführt würdet. Darauf gepietten vnnnd wellen wir/das hinfüran khain Gulden noch Silberer Tuech/Samat noch Seyden stuckh oder waar/Es sey dan von dem ort/da solhs gemacht ist.glaublich damit es erkennt werden müg verzeichnet/in vnnsere Lanndt geführt noch verkhaufft werde/bey der strass hernach gemelt/Vnnnd sollen darüber in yeglichem Lanndt in Stetten vnd in Märckhten/ mit wissen/Rath vnd willen der Oberkheit/an vnnsere stat verstendig Beschawer geordnet werden/die stettiglich auf denn Jar vnnnd Wochenmärckhten/auch dazwischen aufsehen / vnnnd darob sein / damit ain yede Guldene / Silberine / oder Seydene waar gesündert/vnnnd nach irer güet / in zimlichem khauff gegeben vnd gehalten werden.

Gleicherweiff so soll auch der Arras/Satin/vnd dergleichen waar auch Parchant vnd Leinbat/mit der Stett Siglen vnnnd zaichen/von dannen ain yedes khombt/gezaichent/gerecht an gueter lenng/vnd brayt/in die Lanndt geführt/geschawet/vnd verkaufft werden. Wer aber nach publicierung diser vnnsere Pollicey Ordnung/vber ain halb Jar befunden vnd betretten wurde/der sollicher vnnsere Ordnung zewider gehandelt/dem soll erslich der zehent tayl seiner Waar vnd Kräm/Vnd wo Er zum andern mal verprüchlich befunden/der halb tayl/Vnnnd zum dritten jme sein Waar/ Hab / vnd Guet miteinander/souil der betretten/genomen/Vnd solliche straffen jnmassen wie hieoben der Claider halben bestimpt / eingezogen vnd verwennt werden.